

欽
定
全
唐
文

欽定全唐文卷七百七十三目錄

李商隱三

爲滎陽公謝賜冬衣狀

爲中丞滎陽公謝借飛龍馬送至府界狀

爲滎陽公端午謝賜物狀

爲中丞滎陽公赴桂州長樂驛謝勅設饌狀

爲滎陽公進賀正銀狀

爲滎陽公赴桂州在道進賀端午銀狀

爲滎陽公進賀壽昌節銀零陵香麝靴竹靴狀

爲滎陽公進賀冬銀等狀

爲懷州刺史舉人自代狀

爲尚書渤海公舉人自代狀

爲鹽州刺史奏舉李孚判官狀

爲楊贊善奏請東都灑掃狀

爲閑廐使奏判官韓勵改名狀

爲彭陽公上鳳翔李司徒狀

爲安平公賀皇躬痊復上門下狀

爲汝南公上淮南李相公狀

爲汝南公上淮南李相公狀

爲汝南公上淮南李相公狀

爲汝南公與蘄州李郎中狀

爲濮陽公皇太子薨慰宰相狀

爲濮陽公官後上中書門下狀

爲濮陽公許州請判官上中書狀

爲濮陽公上李太尉狀

爲濮陽公上楊相公狀

爲濮陽公上華州陳相公狀

爲濮陽公上陳相公狀

爲濮陽公上陳相公狀

爲濮陽公上陳相公狀

爲尚書濮陽公賀鄭相公狀

爲濮陽公上賓客李相公狀

爲濮陽公上賓客李相公狀

爲濮陽公與丁學士狀

爲濮陽公與度支周侍郎狀

爲中丞滎陽公桂州上後上中書門下狀

爲滎陽公賀幽州破奚寇上中書狀

爲滎陽公請不敘將士上中書狀

爲滎陽公謝集賢韋相公狀

爲滎陽公上集賢韋相公狀

爲滎陽公上集賢韋相公狀

爲滎陽公上集賢韋相公狀

爲滎陽公上宏文崔相公狀

爲滎陽公上宏文崔相公狀

爲滎陽公上宏文崔相公狀

爲滎陽公上河中崔相公狀

爲滎陽公上河中崔相公狀

欽定全唐文卷七百七十三

李商隱 三

爲滎陽公謝賜冬衣狀

右中使某至奉宣恩旨賜臣冬衣一副大將衣四副兼賜臣手詔一通者八行帝語宵降于重霄一襲天衣俯迴于窮節臣當時準詔給散訖臣叨蒙重寄適控遐陬地雖五鎮之衝氣得四時之正每元冥應律顓頊司辰當二日之鑿冰則殊幽野及兩楹之飛雪無異朔山重以寶布少溫蠻縣乏暖方求麗密以禦嚴凝豈望司服頒衣貴臣傳詔

綾裁飛鵠絮裏仙蠶白分椒壁之光紫奪蘭牙之色已均
下將仍速連營晏子狐裘故弊何彰于國儉王恭鶴氅風
流不自于君恩被服有輝負戴無力謹當上宣殊渥下拊
多寒均大詔于瑯琊變無襦于蜀郡麤令康泰以塞貪叨
臣與大將等無任望闕感恩抃舞屏營之至

爲中丞滎陽公謝借飛龍馬送至府界狀

右中使某奉宣恩旨以臣赴任特借飛龍馬一匹并鞭轡
等送至京兆府界者臣謬奉恩榮出叨廉問豈期蹇步深
軫皇慈特命內臣俾騰上駟梁懸蜀鐙几覆吳鞍每多曳

練之疑不假著鞭之力倏踰秦甸將復周閑照地迴光瞻
天送影長亭欲別末期東道而來雙闕尚嘶願附北風之
思無任感恩戀闕雪涕屏營之至

爲滎陽公端午謝賜物狀

右中使某至奉宣恩旨賜臣端午紫衣一副百索一軸銀
器二事大將衣三副并賜臣手詔一通者伏以五神定位
祝融司長養之功六律鈞和蕤賓有酬酢之義故節推戴
禮日著漢儀被艾人遠具于歲時角黍近標于風土乃耆
舊傳聞之末亦君親慶賜之原伏惟皇帝陛下克協樂章

允符時訓恩霑近戚惠浹元寮臣守介蠻圻程遙鳳闕敢
希瘴嶠特降乾文輕縞染衣真金備器海綃掩麗渠盥藏
珍拜受若驚跪捧如失常衣國僑之紵被服多慚久攜顏
氏之瓢捧持未慣當晝而不假文扇向日而惟宜飲冰况
又將以綵絲縈諸畫軸用襁故烝兼續修齡爰自微臣頗
流諸校鞠躬被寵全踰錫帶之榮覩物傳輝實動請纓之
思唯當仰成帝力麤舉藩條誓相率於明時庶同登于壽
域臣與大將等無任望闕感恩抃舞屏營之至

爲中丞滎陽公赴桂州長樂驛謝敕設饌狀

右今月某日中使某奉宣進止就長樂驛賜臣及將吏等
設饌者將承藩寄尚忝朝恩絡繹八珍芬芳九醞臣階緣
薄伎塵辱修塗揚執戟之讀書雖無非聖董大中之對策
何補清時忽委廉車乍離閨籍誠欣列土實耿辭天然猶
食指告祥朶頤有慶爰于近驛式降貴臣酒自堯罇饌分
殷鼎下霑將校旁耀路岐况臣平生本實孤賤懷書奉役
久無黔突之謀入國展儀且懽殽烝之禮飽期滿腹醉更
憂心終虞負乘之災無報雲天之施臣與將吏等無任望
闕感恩結戀屏營之至

為滎陽公進賀正銀狀

伏以運當聖日節在王春近則入金門而排玉堂歡于上
壽遠則梯重山而浮漲海務以獻琛臣受國恩深守藩地
阻明珠大貝南異于百蠻翠羽犀皮北殊于三楚前件銀
出非大冶貨在中金敢以元正式陳方賄望闕憶銀臺之
嶠尚隔仙寮瞻天仰銀漢之流莫階霄露馳心獻祝因物
達誠干冒宸嚴不任兢越

為滎陽公赴桂州在道進賀端午銀狀

右臣伏以握丕圖而御物必相見於離推小正以辨時則

盛德在夏故著爲令節稽以舊章通修任土之宜仰續後天之壽臣方乘傳置未至藩維前件銀已及中塗實從前政拜章獻祝雖令尹以告新納賚展儀欲長府之仍舊謹以前觀察使楊漢公封印進上千春屬慶億載儲休繫以藩條闕覲丹墀之下徵諸貨志且媿白金爲中干冒宸嚴無任兢越

爲滎陽公進賀壽昌節銀零陵香麝靴竹靴狀

右臣伏聞烈山神井開農皇降聖之時南頓嘉禾茂漢后誕祥之日伏惟皇帝陛下系傳太素瑞掩前朝資南訛致

育之功演北極居尊之慶臣方叨廉察已去班行莫階貢
重之儀徒切維禘之禮前件物等或潔凝圭錫芳厠蘭蕪
可傳御器之間儻助薰風之末其餘則攻皮合巧截竹呈
能豈納職于屨人願永康于天步干冒陳進兢越無任

爲滎陽公進賀冬銀等狀

右臣伏以黃鍾應候白琯舒和近訪晉儀禮同元日遐觀
魯史事重朔朝伏惟皇帝陛下與天同休如日之盛將融
漢道兼舉周正臣方駕廉車闕稱壽酒心懸土炭空循太
史之書身遠江湖徒積子牟之戀苟無納贐曷慶履長前

件銀等稟和于天地之爐擢粹于神仙之府豈爲方賄且
自地征對三品之金庶陪白璧廁一九之藥請映元霜私
白身等雖長在遐鄉而生知望闕比從訓示堪備指呼冀
因物以達誠竊先時而效祝七百年之卜願過成周八千
歲爲春敢徵蒙叟干冒陳進兢越無任

爲懷州刺史舉人自代狀

右臣伏准建中元年正月五日敕内外文武官到任三日
舉一人自代者臣伏見前件官汾陽啟胃沙麓遺芳佩觿
之辰平居不戲加冠已後出言成章本以詩書綽有機斷

奉陰郭之良躅御馬鄧之成規臣與其祖禰以來蕃宣相接雲臺高議同承鐘鼎之餘麟閣舊圖共著河山之誓交深志見年齊道均今河內名邦覃懷巨郡南蕃鳳闕平分晉鄭之交北控羊腸方有干戈之役推讓雖循于故事薦聞實切于私誠伏乞聖恩特允臣志無任感恩推賢之至謹錄奏聞伏聽敕旨

爲尚書渤海公舉人自代狀

某官周墀

右臣伏准某年月日敕内外文武官上後舉一人自代者

伏以京邑爲四方之樞咸秦乃天下之樞必命英髦以居
尹正臣謬蒙抽擢素乏材能將何以風采章臺羽儀華省
况又方營咸鎬肇建園陵苟推擇之不先則顛覆而斯在
前件官莊栗以裕簡嚴而寬玉無寒溫松有霜雪頃居內
署實事文皇引裾而外朝莫知視草而中言罔漏洎分符
近甸廉印雄藩不徇物以沽名善推誠而立斷渾若全器
宜乎在庭儻召以急宣被之眷渥必能明張條目峻立隄
防肅千里之封畿總五都之貨殖軒臺禹穴無虧充奉之
儀漢苑秦陵盡絕椎埋之黨特乞俯迴宸斷用授當仁免

今日之叨恩冀他時之上賞于冒陳薦兢越殊深

某官崔龜從

伏以內史故事例帶銀青尹正舊儀平揖令僕必資髦碩
方備次遷臣特以鯁儒猥丁昌運位崇八座官紹三王况
駕有上僊車當晏出務煩廐置役重津途儻讓爵之不思
則敗官而斯疚前件官荆岑挺價赤堇揚鋒稟松筠四序
之榮包金石一定之調由中及外自誠而明昨者故鄣利
遷朝臺受律隱之清節無媿于投香江革歸資唯聞于單
舸必能集同軌之會奉因山之儀使桴鼓稀鳴建瓴流化

伏乞特迴鳳詔以命龜從成聖朝棫樸之詩減微臣維鵜
之刺干黷旒宸伏用兢惶

爲鹽州刺史奏舉李孚判官狀

某官李孚

右件官克生公族早履宦途器實幹時辯能專對加之夙
明韜畧久逐旌旃頃爲知己屈從吏議許文休之流浪萬
里非賒王仲宣之播遷三年未遇儉而不懟困且能通雖
何恤于無家良可悲其絕籍去歲以維新之命大洽鴻私
亦旣旋還合從敘用開成五年十一月十三日吏曹已注

右威衛倉曹參軍授官未謝又蒙挾名除替初云牽復仍
迫屢空京口劉生方思鵝炙洛陽蘇子已弊貂裘方今崇
帝堯敦厚之恩推魏文榮樂之旨豈令棄良材于散地化
王孫爲旅人臣素乏器能叨膺任使控綠池之要地守清
澤之堅城將以宣布威靈彈壓氛祲苟咨謀失所佐理非
材豈惟軼此軍聲兼且傷于朝寄臣深自計孚實當仁况
又得於諸宗且兼通舊諸葛均有因依之分龐士元多鑒
裁之恩是敢輒黷宸階乞榮賓席使得盡其風力佐彼邊
陲雖處平原之曩必將脫穎劒拭華陰之土麤雪幽沈請

依資賜授一官充臣防禦判官干冒宸旒無任戰越

爲楊贊善奏請東都灑埽狀

右臣先臣贈太保某塋在河南縣界臣自終喪紀便參朝
倫三年贊道於宮庭千里違離於墳墓竊惟令式合許芟
除追遠興情敢希榮于陸煜報恩未死寧自誓于義之伏
乞聖慈特從丹懇

爲閑廐使奏判官韓勵改名狀

右前件官名與再從叔故媯州叅軍自勵向下一字同伏
以韓自勵頃因宦遊歿于幽朔羈孤未返親黨莫知近始

言歸因之合族雖爲子之道則慎更名于已孤而諸父之來固難舉諱于其側伏請改名融謹錄奏聞伏聽勅旨

爲彭陽公上鳳翔李司徒狀

某謬蒙朝委實異時才先憂素餐有負疲俗司徒道光纂服功著干城朝廷慮切河湟每難節制非洞知軍志夙練武經則無以完輯師人撫安戎落自承鎮定大治聲謠雲臺議功烟閣畫像必留殊渥以俟元勲伏惟爲國自愛某方祇遠役未獲拜塵瞻戀之誠翰墨無喻到任續更有狀爲安平公賀皇躬痊復上門下狀

右今月得本州進奏官狀報今月十二日皇躬痊復相公躬率百寮奉見奉賀訖伏以聖上祇膺大寶虔奉睿圖務此憂勤稍虧頤攝相公輔宣元首翊贊靈猷戴宗廟之垂休慰黔黎之允望金縢玉檢惡藏請代之書黃屋丹墀每進先嘗之藥至誠斯著休問旋臻然後率百辟以雲趨導九重之日朗百蠻傾耳萬國企心某愧守關河忝分符竹不得少塵班列共展懽呼對熊軾以自悲淚如雨墜望鳳池而結戀心逐雲飛無任抃賀攀戀之至

爲汝南公上淮南李相公狀

某初到京卽附狀伏計上達某幼嘗困學晚亦獻書自履
宦途常依德宇果蒙陶冶遂至顯榮無陸賈籍甚之名遂
王華富貴之願然實脂膏不潤冰蘖居懷頃在藩方常憂
典憲請田五輩遠戒于貪夫投香一斤近追于廉士及移
邊鄙屢易星霜魏尚莫計于收租李牧不聞于捕虜獲修
覲禮復忝卿曹位重大農榮兼右揆當金穀之任爲后稷
之官供億旣切于堯厨主掌實關於周庾諒非巧宦亦異
當仁相公顧遇特深音徽遠降存十年之長垂一字以褒
雖蕭何之自下周昌曾難比數仲尼之兄事子產莫可等

夷捧緘悸魂伸紙流汗方紫職署獨曠門墻仰望恩輝伏
馳魂夢

爲汝南公上淮南李相公狀

伏承恩詔榮徵聖上肇自漢藩顯當殷鼎必先求舊以謹
惟新夫昭貴族而理近官爲邦之遠算險不懟而怨不怒
事君之大忠相公受寄累朝允懷明德傅巖克申三命未
盡嘉謀晉室更作五軍尚慚多讓喜愠罔形于用捨是非
無撓于去留簡素騰輝鍾彝溢美而又志唯逃富道惡多
藏鬬尹之糗一筐皆因君賜江氏之田半頃豈爲孫謀固

合長在廟庭永光帝載使庶政絕貪婪之患大朝無黨比
之憂况今者時逼藏弓禮當輔主元侯功大獨申攀送之
哀伯父位尊使率駿奔之列移寒在律鼓物須雷凡在舍
靈莫不延頸某早蒙恩異獲奉輝光蔣琬牛頭省占佳夢
謝安塵尾屢聽清談果得叨忝圭符留連旗鼓捫心自愧
沒齒難忘竊計軒車已臻伊洛佇見方明展事庭燎陳儀
雨將至而柱礎先知風欲來而巢居盡識下情無任欣抃
踴躍之至伏惟特賜恩察

爲汝南公上淮南李相公狀

不審自跋涉道路尊體何如伏計不失調護昔周文纘十
五王之緒顯正舊邦襄孫總十一德之基方寧故國今惟
新之厯始叶卜于姬公作輔之臣又徵言于單子以今况
古千載一時某竊思章武皇帝之朝元和六年之事鎮南
建議初召羊公征北求人先咨謝傳故得齊剗封豕蔡剔
長鯨伏惟相公清白傳資馨香襲慶始自辛卯至于庚申
雖號厯四朝而歲纔三紀淮王堂構旣高大壯之規漢相
家聲復有急徵之詔桂苑之舊賓未老金滕之遺事猶新
燮理雖繫于陰陽怵惕固深于霜露且廣陵奧壤江都巨

邦爰在頃時亦經蕪政風移馱効俗變侵凌家多紛若之
巫戶絕變兮之女相公必寘于理大爲其防鄴中隳河伯
之祠蜀郡破水靈之廟然後教之厚俗喻以有行用榛栗
棗脩遠父母兄弟隱形吐火知非鬼不祭之文抱布貿絲
識爲嫁曰歸之旨化高方岳威動列城陳於太史之詩列
在諸侯之史今者重持政柄復注皇情便當佐禹陳謨輔
堯考績鄉誅下比朝舉養廉中臺獎枕杜之郎外郡表斬
芻之婦然後司成立學謁者求書大講廢官咸修闕政致
于仁壽煦以和平凡在生靈孰不欣望某早塵下顧曾奉

指蹤江左單衣每留夢寐柳城素几行覩尊顏伏限守官
莫由迎謁空知忤賀不可奮飛下情無任瞻望踴躍之至

爲汝南公與蘄州李郎中狀

某本無宦業過沐朝恩罷護六戎歸塵九署以任兼金穀
時逼園陵有媿交親未遑簡問解攜稍久諸趣如何山公
醉時謝守吟罷茗芽含露籬簾迎風遠想音容杳動心素
惟珍重珍重

爲濮陽公皇太子薨慰宰相狀

右今月日得本道進奏院狀報今月日皇太子奄違儲貳

金史卷一百一十三
三
伏以皇太子道著武闡位高象輅方將傳輝蘭殿積慶桂
宮花枕畫輶永綏福履銅扉銀榜克懋溫文豈謂釁結淳
雷禍纏重海商山羽翼嗟綺季之俱還緱嶺雲霞與浮邱
而莫返相公恩深銘釜地屬持衡攀東序以心傷望春坊
而目斷某忝蒙委寄常竊寵榮不獲齒列班行奔波慰敘
下情無任悲咽遑迫之至

爲濮陽公官後上中書門下狀

右今月日當道押衙劉石回伏蒙天恩重賜加授檢校兵
部尚書官告不許更陳讓者某幸承餘慶遂會昌期早慕

修途獻書試吏晚存遠畧傳劔論兵自擁節旄頻移星歲
常虞尸曠或抵葬章往在番禺已分風憲及臨安定又假
冬卿善政蔑聞竒勲莫建而有不循階陞超授班資且周
禮設官邦政莫先乎司馬漢史解誥士貴無過于尚書外
顧輩流內量涯分遜而不免居亦何安蔡氏厯遷楊公累
代方茲尊顯殊日寂寥此皆相公假借軍聲贊揚聖澤感
而益懼榮以宏憂謹當切誠滿盈遙加率勵古者不辭于
三仕必願致身昔人雖取于十官終期無罪麤申報効以
謝貪叨苟遺此言是不能享鎮守有限不獲奔走陳謝伏

增惶悚之至

爲濮陽公許州請判官上中書狀

韓琮段環裴遵夏侯瞳右件官等或斷金舊友或傾蓋新知既有藉于賓榮敢自輕于主擇輒以具狀奏請訖伏乞相公曲贊殊恩盡允私懇使免孤鄭驛不辱燕臺謹錄狀上

爲濮陽公上李太尉狀

伏見除書伏承光膺新命伏惟感慰四海事畢兩階遇隆式光謙慙之誠克見隆崇之寵今者長君惟睿元子有文

當深慮之所關必殊勲而是賴山濤則曰禱天下之選張
秩則曰用天下之賢西漢之命元成以相門才子東都之
昇鄧禹因先帝舊臣休哉二公叶我一德雖曰曠代乃若
合符伏惟慎保起居俯鎮風俗俟金縢之有見俾玉鉉之
重光某竊憶春初曾蒙簡賜故欲琴樽嵩嶺魚釣平泉豈
貪行意之言便阻具瞻之懇伏惟少以家國爲念也方抵
藩任未卽門闥攀戀恩光不任輸罄伏惟特賜恩察

爲濮陽公上楊相公狀

伏見今月某日制書伏承相公由大司徒之率屬掌中祕

書之樞務寵延注意榮叶沃心凡備生靈莫非陶冶伊昔
帝賚良弼岳降名神夢出傳巖高宗才得于胥靡卜從渭
水西伯止逢于釣翁豈若相公涵泳天池翱翔雲路然後
光膺爰立顯副僉諧接庾亮之分曹必資孔演列王濛之
對掌宜屬劉恢允契同昇果聞並命祇神塞望華夏式瞻
某夙奉恩光今叨任使守朝那之右地鎮安定之遺封不
獲趨賀黑輜拜伏金印空知踴躍莫可奮飛下情云云

爲濮陽公上華州陳相公狀

伏蒙榮賜手筆某揣摩莫効耽翫無聞不過功曹平生素

分願爲小相曩昔殊榮而幸遇清朝遂階貴仕玉門關外
何成異域之功灞水亭邊徒有舊時之號此皆頃在邊上
日相公方調殷鼎正運漢籌不復軍租仍寬虜級已得入
叨九扈克罷再麾恩顧未酬音徽仍繼禮踰名品事越等
倫望星宿于三台背惟浹汗感春秋之一字心不容銘仰
望旌門恨無羽翼下情云云

爲濮陽公上陳相公狀

伏見今月某日制書奉承相公顯由起部光踐黃樞唯彼
秦宮必加漢相是能超絕庶尹冠映羣倫昔荀悅榮登止

通左氏張華寵拜空對建章豈若相公翊贊皇猷發揮清
問恥君不及堯舜欲人盡若胥庭式叶具瞻爰從正位馮
參帷幄式展于矜嚴杜恕紀綱不資于交援曠百千歲無
三四人某忝沐陶甄謬居藩服心懸廊廟同邊馬之嘶鳴
身繫節旄羨塞鴻之騫翥無由拜賀伏用兢惶

爲濮陽公上陳相公狀

某少乏能名長無清譽書非十上劍敵一人而命與時偕
道將運會南踰祝髮西扼狄鞬分起部而未淹遷司戎而
何速飛章雖達丹款尚稽顧此尸承實爲塵忝相公上宏

信及仰贊恩覃優柔列藩容易好爵得雖有自居亦甚危
銘在座隅鏤之心骨唯當策無妄舉令有必行慮以前茅
馭之長轡克成戎律以奉廟謨伏惟始終恩察

爲濮陽公上陳相公狀

某當道行軍司馬崔璫朝奏在城今月十七日得狀云今
月十二日于太清宮齋宿處獲謁見相公伏承首座相公
特論某所請不許吐番交馬事合大體當時魏謩起居備
錄其事者伏以本道與鳳翔節制雖殊封疆相接俱當料
敵同切成謀最爾寇戎不循盟誓稽留重使侮易大朝旣

以非時又稱繼好深慮得請便有乘機遂敢竊獻情誠屢
陳賤疏言雖當病事且侵官加以思惟方憂罪責不謂相
公更因數奏深賜褒稱使賈誼上書達于天聽山濤立論
著在史官榮冠一時名留百古顧茲非望皆有所因仰戴
恩輝畧踰涯分謹當坐以待旦居無求安墾叔子之田疇
修李興之政具忽承後命有以先登羸異驅馳用爲報效
伏惟始終恩賜知察

爲尚書濮陽公賀鄭相公狀

右伏見今月某日制書以相公累請退閒特從休澣式崇

階級無廢平章元老道尊必用三王之禮中樞務重猶當
五日爲期伏惟相公德契昭融言成啟沃太邱家法若守
官司京兆門風宜書甲令仰攀日月高拱星辰爲堯闢四
聰禹來五諫始者以疊生鼎飪禍接藩維前殿朝迴莫收
金印凶門師出空委油幢當是非擾攘之間卽内外危疑
之際相公克凝庶績顯執大權爲易于難制動以靜阜
斯入無聞鮑永之兵黃閣洞開例醉曹參之酒然後澄清
流品提挈紀綱補吏盡去刻深用人不由黨援咸有一德
于今三年深惟逃責之規載切避榮之旨削藁章數免冠

請頻張良却粒之懷錙銖軒冕范蠡扁舟之志夢想江湖
異代結交殊時合志果當渥澤爰峻等威祇奉青宮監臨
東觀教溫文于漢字總端揆于秦官百辟之劍佩以隨六
館之生徒是屬手扶帝座身帶天光何澄闕朝寧妨理事
杜夷就第無曠執經煥發丹青光昭簡素乾惕無咎謙尊
以光某謬奉詔條嘗承廟算慙指蹤而未曾獲免仰儀刑
而徒歎登龍亦冀終遂息肩永當褫帶地遊蒙穀更趨方
外之神人洞入華陽猶詔山中之宰相羈牽尚爾抃賀無
期瞻望輝光伏增攀戀

爲濮陽公上賓客李相公狀

不審近日尊體何如相公踐履道樞優游天爵功無與讓
故勇于退能不自伐故葆其光自罷理陰陽就安調護鳳
池來者守咎繇之矢謨雞樹後生奉蕭何之畫一用而無
喜成則不居求諸古今實煥絳素某早蒙恩顧累忝藩方
本冀征轅得由東洛伏以延英奉辭之日宰臣俟對之時
止得便奏發期不敢更求枉路限于流例莫獲起居瞻望
恩光不任攀戀倘蒙知其丹赤賜以始終則雖間山川若
在軒屏伏惟時賜恩察

金史卷一百一十三
為濮陽公上賓客李相公狀

不審近日尊體何如此方地控淮徐氣連荆楚不惟土薄兼亦冬溫維揚居萬國之中得四方之正或聞今歲亦不甚寒相公百祿所綏五福攸集伏料調護常保康寧從古以來大賢所處未有不功高而去德盛而謙以烟水爲歸塗指神仙而投分名高百古事冠一時然而內難外憂不常而起深謀密畫須有所歸則呂望老于渭濱始持兵柄周公還于洛邑復秉國鈞亦不草芥軒車埃塵祿位不關通介蓋屬安危相公昔在先朝實康大政當君子信讒之

日稟達人大觀之規據梧但歌反袂無歎及爲賓望苑分
務洛師徐勉園中唯餘卉木陶公嶺上空有白雲小竹帛
之所傳鄙鼎鑊而不問夫以行藏定分用捨通方當遭時
復生之前立功立業者甚易及受簡被疑之後不怨不怒
者至難遠則狼畏跋胡鴟憂毀室近則越蠡扁舟而獨往
漢良却粒以辭榮雖同畏危機亦不得中道仰惟閭奧實
冠品流今寶厯旣初聖政茲始將安丕祚必屬宗臣凡在
隱微莫不祠禱某早蒙獎拔得被寵榮番禺將去之時獲
醉上樽之酒許下出征之日猶蒙尺素之書便道是拘登

金定全居三
卷一百三
門莫遂向風弭節掩泣裁牋思幄戀軒不勝丹款伏惟終
始恩照謹狀

爲濮陽公與丁學士狀

近頻附狀伏計相次達上自學士罷領南臺復還內署朝
委攸重時論愈歸夫一時効功逐惡者鷹隼千年呈瑞應
聖者鸞皇擊搏殊能翱翔異品當在紫庭無事應韶濩以
來儀豈復白野有求與雲羅而並出唯聽後命爰副具瞻
某才謝適時仕無明畧久乘亭障長奉鼓輦猿臂漸衰燕
領相誤弊廬仍在白首未歸顧臯壤以興嗟念路歧而增

歎當依餘眷庶愜後圖仰望音徽不勝丹赤

爲濮陽公與度支周侍郎狀

伏見除書伏以小司馬掌邦計伏惟感慰侍郈致君業廣
圖國功深頃在內朝則裨大政昭獻御極名高侍從之臣
昭肅握圖迹在循良之傳今上講求羣辟深念大藩以自
江之西雖豫章爲輿壤而居河之上推白馬爲要津爰陟
廉車以登將席長城萬里大國三軍雪諸儒之懦名盡將
軍之威令果承紫詔來駕墨車向闕馳心敷廷識貌清秋
一鶚碧海孤峯天子動容羣僚服美便合入居台鉉以慰

華夷然以天下之賦輿海內之財幣是資經費宜屬成謀
苟失當仁則乖大計故晉室有鬻練之乏漢臣興造幣之
端是不得人何以爲國仰惟餘地已不同年矧又秩貳夏
官任毗司馬昔祈父爪士未有兼官方朔侍郎不聞釐務
倚之爲相今也其時某伏限守藩莫由申賀山河百二已
抱歸心風水五千况兼離戀瞻望門宇不任懇誠

爲中丞滎陽公桂州上後上中書門下狀

右某自解北闕出守南荒嘗犯露以脂車無侵星而擁棹
卽以今日到任上訖桂陽始至荔浦初臨警宵鐘而尚

誤晨趨聞暮鼓而由斯夕拜仰瞻鑪冶實隔烟雲唯當恭
守詔條欽承廟算寬其竭馬任其鞭羊襦袴廳及于疲人
禮樂必資于君子伏惟俯賜恩察

爲滎陽公賀幽州破奚寇上中書狀

右得進奏院狀報幽州張相公大破奚寇斬馘刺史已下
並焚燒驅獲車帳器械牛羊等伏以近歲以來北番微擾
奚寇恣其狗盜頗復鴟張相公鈎格傳能崆峒稟氣克揚
戎畧式靖邦讐姑用火攻未加湯沃刺睢盱之面貫聾聵
之耳帳幕如掃干矛盡燼聚輪轂于戍樓出羊牛于塞草

此皆相公授其軍令雄此邊聲願崇九伐之威且舉一隅而示昔越平吳國實立賀臺楚勝晉軍將爲京觀固不可銘山示績畫閣傳勲盡良相之廟謀豈將軍之天幸某謬蒙任使竊慶翦除伏恨守藩闕陪賀列無任抃躍攀戀之至

爲滎陽公請不敘將士上中書狀

右某當管將士本一千五百人有北境兩度行營有西京十鎮防戍旣部伍皆更招收數額則轉增加糧料不經申破留州自備累政相成况近年不甚登穰亦經水澇挈舟

負弩尚嘆于征途，稽穀神蠶未豐于下舍。今縱仰承渥澤，合進勲階，將徵簡禮之資，盡有囊裝之許。雖祁寒暑雨，小民不識于天時，而露冕褰帷，長吏合宣其人。願輒以具狀奏聞，訖伏乞相公俯推近例，許且權停干冒，尊嚴無任戰灼之至。

爲滎陽公謝集賢宰相公狀

花犀腰帶一條，右伏蒙仁恩俯寵，行邁駭鷄等貴。畫隼增輝，徒勤萬里之肺肝；愧乏十圍之腰腹，仰從台袞來飾藩垣。縱拜賜而有期，懼立朝而無取，謹依處分，捧領訖下情。

無任戴荷之至

爲滎陽公上集賢韋相公狀

某行役以今月二十八日達潭州訖囊裝簡薄賓御單輕但承霖雨之功免值風波之阻計塗非遠到任有期方積懼于貪叨豈暇懷于啟處當道適臨遐徼奉遠宸居輒亦導以簡書頒之詔旨省迎新之費謀卽舊而安匪務先聲實行素志其于脂膏有戒冰蘖自規不唯稟以廟謀固欲誓于神道冀傾篤蹇用副恩憐苟渝斯言是不能享伏惟終賜恩察俯揚征棹仰望台庭敢階開閣之賓唯羨吐茵

之吏下情無任結戀感激之至

爲滎陽公上集賢韋相公狀

某素乏異能驟蒙殊寵實幸藩宣之日得承陶冶之餘不敢遑安以須至止卽以今月某日到任上訖數屬城之地半雜遠夷稽守器之人多非命士雖欲竄修理行終憂不致殊尤唯當惠撫疲氓智籠獷俗則蒲盧之善養冀桑椹以懷音兼宏獄市之規以奉巖廊之化伏惟特賜恩察

爲滎陽公上集賢韋相公狀

伏見制書伏承加集賢殿大學士恩極台階榮兼秘殿通

鳳池于冊府擢雞樹于書林中外具瞻遐邇增慰相公黃
中稟氣素尚資仁片玉一枝已光于昔日前籌五鼎果慶
于茲辰況又高步瀛洲領官仙掖佇見亡書必復墜簡重
編使三千之徒並受其義俾百家之說各有所安芟翦繁
蕪整綴差謬某早承重獎今守遐藩雖榮廉問之權實羨
校讐之吏仰瞻門闥俯抱肺肝陳賀未由伏深感戀

爲滎陽公上宏文崔相公狀

某行役以今月二十八日達潭州訖波恬風止帆駛舟輕
遠承殷櫟之餘利濟熊湘之水況茲樂土嘗扇仁風式訪

顛毛兼詢憇樹吏皆攀轅之士民皆遮道之人縣以歲時
深在肌骨何武以兗州之政黃霸以潁川之能或入作尹
京或登爲國相向若非相公清門重德士範詞宗則安能
侔兗潁之佳聲兼何黃之盛拜况運當惟睿聽屬虛襟仰
贊治平固在朞月伏惟善保尊體以副沃心某實乏異能
叨當問俗未識褰帷之後何酬大治之恩唯當務以躬親
蠲其疾癘煩宣詔旨諮稟廟謨冀免尤違庶可避辟伏惟
遠賜恩察

爲滎陽公上宏文崔相公狀

伏見制書伏承天恩榮加崇文館大學士某竊尋舊史常
仰清門魏齊以來閎閎相繼皆當代才子翰林主人相公
傳慶降祥重規疊矩漢籌殷鼎已慶于台階玉軸芸籤重
光于冊府仰惟成命實屬當仁某過沐恩光末由陳賀感
激瞻戀不任下情

爲滎陽公上宏文崔相公狀

得進奏院狀報伏承尋達上京賢相還朝元侯入覲皇闈
曉闢朱旗將金印同歸碧落宵清台座與將星俱耀事光
聞聽道合休明况相公瑞玉揚輝貞金抱質冠明舜日袖

舉堯風挺山立之奇姿鬱鼎角之殊相固已表儀朝列傾
注宸襟鳳藻刷其前池鸞翱翔于故闕淺深魏邴陟降蕭
曹凡在含靈莫不增抃况某忝當寵寄曾奉恩光伏想嚴
道來儀方明展事漢營前箸張子房不讓成功齊并新柴
管敬仲豈辭殊禮限縈廉察闕備班行且未卜於登門徒
有賀於華國抃躍攀戀伏深下情

爲滎陽公上河中崔相公狀

某因緣薄伎獲奉休期左掖中臺已踰厥任廉車憲印轉
過其材卽以今月七日起任相公早於寮故俯察孤愚寄

以夙期霜之好款今者辭違稍遠拜謁末由捨魯首燕不勝私懇河中帶朔方之兵甲爲皇都之股肱竊思宸襟嘗注碩德下車敷化期月有成則必復還廟堂重執時柄雖欲固讓如蒼生何伏惟俯爲明時善加保重到任當差專使起居諸續陳啟

爲滎陽公上河中崔相公狀

天恩刑部相公登庸伏惟感慰刑部相公盛烏衣之遊相公稟青雲之秀更歷股肱之郡咸登鼎鼐之司凡在生靈不任欣慶昔疎廣家滎兩傳止當儲護之朝王儉門有二

台不在休明之運將煩擬議又豈同塗某方守藩條闕陪
賀客唯願蕃昌姜姓恢大崔門永令阮巷之間迭奉堯階
之化伏惟特賜恩察

欽定全唐文卷七百七十四目錄

李商隱_四

爲滎陽公上僕射崔相公狀

爲滎陽公上僕射崔相公狀

爲滎陽公上史館白相公狀

爲滎陽公上史館白相公狀

爲滎陽公上史館白相公狀

爲滎陽公上門下李相公狀

爲滎陽公上門下李相公狀

爲榮陽公上門下李相公狀

爲榮陽公上荆南鄭相公狀

爲榮陽公謝荆南鄭相公狀

爲榮陽公上荆南鄭相公狀

爲榮陽公上淮南李相公狀

爲榮陽公賀幽州張相公狀

爲榮陽公上西川李相公狀

爲榮陽公上西川張相公狀

爲榮陽公賀牛相公狀

爲滎陽公賀牛相公狀

爲滎陽公上衡州牛相公狀

爲滎陽公上通義崔相公狀

爲滎陽公與昭義李僕射狀

爲中丞滎陽公與汴州盧僕射狀

爲滎陽公與浙西李尚書狀

爲滎陽公與度支盧侍郎狀

爲滎陽公與京兆李尹狀

爲滎陽公與河南崔尹狀

爲滎陽公與魏中丞狀

爲滎陽公與容州韋中丞狀

爲滎陽公與裴盧孔楊韋諸郡守狀

爲河東公上楊相公狀

爲河東公上楊相公狀

爲河東公上鄭相公狀

爲河東公賀陳相公送土物狀

爲河東公賀楊相公送土物狀

爲河東公賀李相公送土物狀

爲河東公上李相公狀

爲河東公上李相公狀

爲河東公與周學士狀

爲宏農公上虢州後上中書狀

爲宏農公虢州上後上三相公狀

爲宏農公上兩考官狀

爲懷州刺史上後上門下狀

於江陵府見除書狀

上令狐相公狀

上令狐相公狀

上令狐相公狀

上令狐相公狀

上令狐相公狀

上令狐相公狀

上令狐相公狀

欽定全唐文卷七百七十四

李商隱_四

爲滎陽公上僕射崔相公狀

伏見除書伏承新命相公廟鼎調味戎麾著功佩印來歸
執圭入覲朱暉黃髮尹勳清操想名氏而疑古儼風容而
在今固合重處化源再毗昌運而道唯養退志在遠權慮
不節以成嗟恐知進而無亢飡鋪典訓寢興儔賢堅拒注
懷退守師長然竊惟故實式見優崇胡廣五遷方膺此寵
荀覲四讓始受今榮皆名絕品流事高銓攝伏想當仁有

裕得請爲娛從容於鳳池雞樹之間焜耀以蒼玉阜檐之
飾雅稱鎮物孤風動人凡在含靈孰不仰止某早承重顧
今守遐方唯嘆羈留莫伸抃賀望蘭臺之秘邃天上人間
附桂水之平生一日千里攀戀之至無任下情伏惟俯賜
恩察

爲滎陽公上僕射崔相公狀

某以今月九日到任上訖疆分楚越民雜華夷殫獷俗巫
風帶三居五宅頒條之寄稱職爲難伏幸過潭州日得與
輿人詠我台座聞寇恂之理行窺樊仲之官司誓欲披拂

仁風禱祈膏雨麤師遺愛俯惠疲甿伏料清光必亮丹款
至於酌泉投香之戒飲冰食蘗之規實惟素誠敢有貳事
伏惟特賜恩察

爲滎陽公上史館白相公狀

某行役以今月二十八日達潭州訖輕帆直渡長檝橫飛
仰承金鉉之恩輝幸免石郵之留滯但以素無勲效謬奉
寵榮俯憂攬轡之時有辱洪鑪之賜然亦欲簡惠以臨雜
俗誠明以待遠人稟王符黜政之規略王霸米鹽之政使
疲羸措手頑梗革心伏見恩制伏承相公因緣新座懇讓

兼榮仰讀綸言實光鼎味凡在生植孰不歡呼昔齊氏主盟亦分三鼓晉人興讓遂立五軍彼皆列國之僚尚煥素臣之史豈若相公顯夫睿哲克致昇平當注意於作相之時盡同心於官僚之事況典冊之任古今所難繫百代之觀瞻垂一王之楷法固在專修凡例謹授諸儒則獸殿刪儀瀛洲集論校其輕重良有等夷將令能業其官必在各司其局某早蒙榮顧遙奉休聲徒勤仗節之心未有望塵之路抃賀之外結戀伏增

爲滎陽公上史館白相公狀

不審自經哀苦尊體如何王丞相之還臺不無深感潘黃
門之歸路諒有餘悲然訪以元言推之大觀苟陶埏於莊
惠豈蒂芥於彭殤伏惟上答皇私下裁沈痛俯安寢膳以
定樞機不以鍾情或虧常理東門吳向無之說則近傷慈
魏陽元自損之言實存深旨某早承恩矚方此辭離憂望
之誠頃刻無喻伏惟俯收卑款以慰遐落情云云

爲滎陽公上史館白相公狀

以今月九日到任上訖地當嶺首封接蠻貊猿飲鳥言罕
規政令銀簪銅鐻本主羈縻實憂下才無以布政唯當推

金定台曆卷之二十四
誠慮物潔已臨人畏楊震之四知從士伯之三務所冀麤
攀方國無失賦輿然後宣布朝經闡揚廟算設學舍媒官
之令峻頑人罷女之科仰奉恩知敢同荒墮伏惟特賜恩
察

爲滎陽公上門下李相公狀

某行李今月二十八日已達潭州訖某曾無材術謬忝恩
榮雖曰小藩且兼雜俗慮物斯至撫躬不任昨者迎迓之
初麤停浮費至止之後務扇仁風苟或滿假爲心墮偷在
念豈爲顯責當逭幽誅伏計亦賜信察南郡旬時方集水

潦重湖吞吐實亞滄溟未濟之間臨深是懼及揚帆鼓枻
則浪靜風和不吟行路之難乃仗濟川之便儻聞見之下
指教所存苟可輕其悔尤敢不聳於諮稟伏惟特賜留念
爲滎陽公上門下李相公狀

某以今月某日到任上訖漢縣舊封越城遐嶠夷貊半參
於編戶賦輿全視于奧區不知疎蕪曷處盤錯唯當仰承
指訓俯事躬親合農功於國僑思馬志於文子冀申豪髮
用贖簡書至於生事沽名迷方改務實於他日則已誓心
庶遵丙吉之規稍勵賈琮之志伏惟特賜恩察

爲滎陽公上門下李相公狀

伏見恩制伏承屢貢昌言請均兼職副天道福謙之旨遵
元元象易之文果降絲綸式光鈞軸永言欣荷難以鋪陳
且詩戒從事獨賢傳美同班相卹知者甚衆行之實難苟
未研味道樞探詳物理則安得盡賢哲之至蹟合經典之
大猷凡在含生罕不伏羲况朝廷道先報本業重承祧必
用親賢以奉宮廟若華委照仙李垂陰恢大君無忝之功
稟聖祖永存之慶某早蒙恩異雖遠拜辭擊節嚮風撫牀
竊抃末由陳賀攀戀伏深

爲滎陽公上荆南鄭相公狀

某謬蒙恩渥寄以察廉退省庸虛實深兢惕伏幸塗經荆楚行拜旌麾冀於侍讌之餘得受發蒙之教卽以今月七日赴任桂林不唯雜俗實介遐荒然處於上游嘗是重德餘波所及孔道是因羸仰仁聲必康疲俗况某早緣宗族辱奉恩知便路起居率誠諮稟庶常祇佩用免悔尤慰忭之深先積卑懇上路後續更有狀伏惟照察

爲滎陽公謝荆南鄭相公狀

伏蒙仁恩賜及銀器綾紗茶藥等某雖征遐嶠亦守小藩

金定公集卷之三
就道已備資糧到鎮廳有俸入實無闕乏可軫恩憐方幸
經途得遂拜覲稟同姓異殊之禮展小國事大之儀宴好
頻仍言教懇至長途方卽厚賜仍加俯稽推讓之誠益重
違離之戀謹依榮示別教捧領訖下情云云

爲滎陽公上荆南鄭相公狀

不審近日尊體何如道濟明時德彰暗室固已神祇薦祉
寒暑均和竊料寢興常保休祐下情無任忭慰之誠近者
上臺出爲外相伏思元老已注宸心況十叔相公師律克
貞功成允懋運籌調鼎已著於他年反風起禾更在於今

日不唯宗族實係蒸黎伏爲俯爲休明善加頤養某實無材術叨處察廉唯當規奉上游因依下顧庶將兢惕以免悔尤尋欲慎擇時才式將好幣屬楚南越北苦異繁華捆載橐裝更無珍妙又虞菲廢以辱藩條覲冒之誠陳喻無所李支使商隱雖非上介曾受殊恩常願拜叔子於薊州更諮魯史謁季良於南郡重議齊論抒其投迹之心遂委行人之任其他誠款附以諮申伏惟俯賜恩察

爲滎陽公上淮南李相公狀

某素無材術謬竊寵榮論駁靡效於掖垣廉問更叨於藩

服此皆相公十一丈早迴掄覽曲賜丹青知其平生未始
郅曲振毛羽於衝風之末脫氛埃於剛氣之中雖曰至愚
實佩嘉貺卽以今月七日赴任瞻戀旌旆徘徊路岐杳然
向風魂動心至相公十一丈早參大政克建殊勲成則不
居惕而無咎然今茲昌運實屬長君優游雖縱於宗臣融
冶必資於宰匠竊計明臺衢室已懸夢思豈復龍節霓旌
可淹偃息伏惟特加寢膳以副禱祠歸奉休期遠登壽域
內修百職外庇庶藩則某雖僻在遐方仰違德宇片心朽
質萬里不孤特希終始恩亮到任卽差專使起居諸續陳

啓謹狀

爲滎陽公賀幽州張相公狀

得本道進奏院狀報相公親鼓上軍大破奚寇威加元朔
慶動紫宸凡在生靈莫不欣快伏以北邊諸虜最強者奚
車帳旣雜於華風弓戟頗窺於漢制馬牛銜尾羔駱交蹄
朝廷常壓以雄軍處之重將訪於耆舊不絕侵漁相公太
白傳精雷泉稟氣黃公授略元女與符綦連四弓常推其
百勝蘭子七劒不顧於萬人建牙旗而草樹分形橫琕戈
而烟雲斂氣而又以功勳任已感激事君每雪涕以論兵

願風驅而掃寇永言異類曾不畏威或獸搏於桑河或鴟
張於遼水彼專其暴我務於仁彼輕進以易奔我薄威而
養銳待人百其勇士一其心然後分命驍雄尅期討伐珍
國見賊唯懼其少韓信用士每辦於多一麾而大野朝昏
再鼓而窮荒晝赤朱旗喪斧逸馬迷輪耳盡貫而無所伏
聽面皆夷而不容泥首燔焚殆盡孳息全空向若非動有
成謀舉無遺算以廟堂之決勝佐沙漠之橫行則何以致
此一朝平其積患昔漢時驍將多以後期周室虎臣唯稱
薄伐比於今日詎可同年某嘗讀兵書誤兼文律馬援聚

米曾或留心奚反持矛未至無力遠廉嶺表遐仰邊功闕
申賀於行臺空抒懷於尺牘執筆撫劒欣慕無任伏惟俯
賜照察

爲滎陽公上西川李相公狀

伏見除書伏承新命某竊惟故事頗服前言令王之守四
海也尊胥附之友立禦侮之臣周室之均五等也命晉楚
更盟俾周召分理必配之重德倚以奧區然後可以祇承
大君表率羣辟今中秘黃門之重胥禦之所處也井絡廣
陵之大侯伯之所分也本以英靈烜之事任猶在神明所

祐禱祝有成苟非上材曷處斯寄伏惟相公指南儒術華
蓋詞林擅揚馬之文章富伊臯之業望自顯扶皇極允踐
台階不如蕭何見漢祖之高論以告仲父識齊桓之格言
故得四翟八蠻九流萬國波恬巨浸草偃高風而又成則
不居亢而知退雖延睿想終協元機况井鬼分疆岷峨會
險殷富則銅山丹穴精靈則雁水犀津池留萬歲之名橋
有七星之號碧雞使者部下時來白鳳詞人座中常滿以
功成名遂之日處旣富且貴之尊意氣良辰優游豐福爲
古今之圭表兼將相之安危訪於前修無以擬議某早承

顧念曾被陶埏今者五嶺之衝再麾是守灌漏卮而填巨壑尚隔盃盤朝白帝而暮江陵空吟風水感知懷戀無喻下情更須旬月遣專使起居伏惟俯賜照察

爲榮陽公上西川張相公狀

不審近日尊體何如玉壘延清錦城致爽伏料撫寧多暇福祐來成相公白琯正音黃奭重器道旣著於燮理績復彰於旬宣方今化切修文時當偃伯必資元老以冠庶僚雖羽儀未集於方明而夢想固通於中夕佇見坤維返駕宣室虛襟更躋湯禹之姿重講胥庭之化訪諸動植望在

金定合月三
旬時况某仰奉恩知獲階廉問既殊常品實倍私懷赴任
有程瞻風未卜結款詞訥依仁路賒冀申毫髮之功永奉
陶甄之賜卽以今月七日進發到府續差專使起居伏惟
恩察

爲滎陽公賀牛相公狀

伏見除書伏承遷寵相公允膺四輔光贊六朝靜則龍蟄
存神在一水而無悶動則鳳翔覽德自千仞以來儀雖世
塗則有汙隆而吾道終無消長憶昨暫非利往遠適荒陬
仲尼之不陋九夷子文之能安三已永言閭閻實冠品流

今者復自衡陽去臨汝水以舊丞相兼老成人竊計中塗
即有新命俯移高尚還處燮和欲將不爲蒼生其若仰孤
清廟某昨者幸因行役得奉輝光伏蒙賜以從容降之談
吐語百代之損益定九流之否臧調以道心附之禪理始
知全德不可度思此時退以語人便將心卜恐未可絕張
良之粒具范蠡之舟今則果然不差懸料伏望遠離下土
促動前騶復昔日之九遷慰今晨之四海某限當廉察未
冀趨承於抃賀而則深顧辭離而漸遠南荒受任方榮便
道而來東閣重開畏在他人之後瞻戀思顧不任下情伏

金文合集卷五
惟俯賜照察

爲滎陽公賀牛相公狀

相公才爲時生道應夢得六月一息宜澡刷於天池五色
成章必騫翔於雲路嵇山莫峻黃波未宏朱絃奏廟而八
音以和瑞玉禮天而百神斯肅不有人傑誰康帝家始者
召入紫宸親承清問仲舒演春秋之奧孫宏闡洪範之微
抉摘姦豪指切貴近雲霞動色日月迴光超絕古今喧傳
華夏蒙恬之筆鋒斯挫張永之紙價彌高言在必行得之
何讓運祚唯深源是繫富貴逼安石不休密勿平章從容

輔翼或武思禁暴則暫別鳳池及功著于藩則復還龍節
夷險一致左右皆安爰自保釐遂昇端揆納言名憤進賢
號冠師長羣僚協宣庶績得人之盛非才不居王詢在朝
晉室每多其經籍徐宣留務魏帝不視其文書式究彝倫
是稱尊顯固當允諧羣議克注上心重秉國鈞復執人柄
某謬逢嘉會素乏殊能而受寄疆場假名省署清光莫覩
丹慊徒深望京華而甚遙聽邊吹而增歎下情伏增抃賀
攀戀之至

爲滎陽公上衡州牛相公狀

不審近日尊體何如相公早輔大朝顯有休績伊尹同德
臯陶矢謨並著在典經垂於名命而又載懷達節不有成
功神理佑謙天道保退伏料調護常極和寧然某竊計前
經遐追曩躅險而不墜邵公所以能諫約而無疊重耳所
以復還况今慶屬休期運推常武必資國老以立台庭伏
料卽時入膺榮召凡在華夏莫不禱祠某實乏勳庸謬當
廉察將因行役獲報尊嚴俯執輕撓恨無飛翼會昭潭積
雨南楚增波尚滯旬時若隔霄漢齊心結念常存李固之
匿屏倚寐銜誠已夢孫宏之脫粟攀戀之至猶積下情

爲滎陽公上通義崔相公狀

門下相公出鎮坤維相公進扶宸極某竊尋前史仰考昌
時必有上台號曰當國姬姓則魯周公居君牙君陳之上
漢室則蕭相國在張良韓信之先專吐嘉猷獨融明命伏
惟相公克懷懿德允遇休期一自燮調屢彰勲伐恥君不
及於堯舜遠過前人舉賢不避於親讎深符直道果茲優
寵首在注懷外耀國華內榮官族鳳池浴日聊均潤於同
人雞樹侵雲憶分陰於遊子曠百千歲無三四人凡在舍
靈敢不從化况某早蒙恩顧今獲驅馳伏限頒條莫由陳

賀檻猿絆驥敢嘆於拘留邱室膺門實懸於誠抱抃賀攀戀不任下情伏惟俯賜恩察

爲滎陽公與昭義李僕射狀

某素無才能謬忝廉察實憂尸祿有負疲人僕射地處親賢情殷家國累更重寄亟立殊勳上黨頃集兇徒近爲王土瘡痍未復愁怨尚多果枉雄才以孚至化南則揚河橋之威斷北則煦上谷之仁聲下車政成投刃節解厚承恩顧抃賀伏深拜謁末由無任瞻戀到任續更有狀

爲中丞滎陽公與汴州盧僕射狀

某謬蒙渥恩叨受廉察顧循虛薄頗積兢惶僕射克著殊勳允承寵重所至皆理無難不更宣武兵多大梁地要承言今昔常繼風流不唯寄以安人多是倚之爲相況當碩德尤注羣情某厚蒙恩知倍深倚望卽以今月七日赴任續更有狀

爲滎陽公與浙西李尚書狀

某材術素空寵榮疊至未申論駁俄忝察廉尚書允贊休期克抱全德直以高堂指訓外地優閒尚稽廉部之名實積具瞻之望然賢豪出處典冊傳流故有移孝作忠自家

金史卷之二十一
刑國推會顏之至行參郤魏之嘉猷將使爲臣皆規令範
出征入輔尤叶羣情厚承恩憐倍注誠款卽以今月十日
赴任到鎮更當有狀

爲滎陽公與度支盧侍郎狀

某今月九日到任上訖不任感惕職重賦輿俗參夷獠務
便宜於五嶺或有可觀同刺舉於三河竊將不可但期尅
苦用答恩榮侍郎早立清朝久持重任未處平章之地猶
孤動植之心昔周室均財司會且參於太宰漢朝主計丞
相仍兼於列侯故事具存殊恩允屬側聆注懇實倍常情

伏惟俯賜照察

爲滎陽公與京兆李尹狀

伏承榮膺新命伏惟感慰閣下深蘊材謀久未登用雖當
劇任猶屈壯圖然五歲之中二都咸歷東京圭表已肅於
殷頑西雍山河佇奔於晉盜便承寵擢入贊休明注望之
誠頃刻斯至某實無材術謬忝察廉方蘇瘴嶠之疲羸闕
覲章臺之風彩受釐辱召對策叨名雖羈旅於小藩實寤
寐於餘眷未期拜賀無任馳思

爲滎陽公與河南崔尹狀

某實無績效謬竊寵榮顧憂菲陋之姿必負澄清之寄十
五丈周旋華貫彰灼休聲尋合光輔大君俯成嘉運直以
避榮爲意勇退是謀大鬱物情未副公議然民資先覺材
爲時生苟卷懷而太深則燮理而何望伏惟時以爲意也
末由拜謁瞻戀伏深到任後續更有狀

爲榮陽公與魏中丞狀

某以九月九日到任上訖映帶谿洞錯雜蠻夷剛鹵石田
事殊於農政實懔越紵功異於桑均實懼踈蕪有辱廉撫
至於屏除苛黠賞慰柔良敢忘深薄之規以累準繩之地

伏惟特賜照察

爲滎陽公與容州韋中丞狀

伏料旌旆將及容州先以仁聲浹之和氣遠夷畏服疲俗
乂安豈待經時然後報政某素無材效忽被恩榮實幸小
藩得親奧壤仰承餘論庶免曠官卽以某月日進發到任
續差專使馳狀

爲滎陽公與裴盧孔楊韋諸郡守狀

某素無材效謬忝恩榮實積兢惶罔知啓處大人盛名典
郡碩畫佐時將以俯歷州鄉深求疾瘼然後入膺寵命以

副具瞻不唯卑誠實在公議末由拜謁結戀無任

爲河東公上楊相公狀

某少乏高標本無遠韻徒以堅同匪石直慕如弦遂忝人
曹乃行官牒略無淺效以答明時豈謂復冠六聯又司九
法柳營莫從於多讓蘭臺超假於前行若非相公允輔朝
恩克成人美將其加秩可以雄邊則安得及茲無容而授
謹當以身爲率尅已而行義若霜明斷如劒刺使其有勇
兼且知方免穴雖多盡思堙塞臬巢任固皆誓焚除微振
軍聲以緩官謗伏惟特賜恩察

爲河東公上楊相公狀

右件官是某親弟頗長政事早履宦途爲宰而績著一同
作掾而學推三語脂膏莫潤珪玉無瑕然至於稽勾緡錢
掌司財幣未嘗留意素非所長自某年月日蒙今荊州李
相公差知塢橋院後常所兢惶每虞敗累上虧國用旁負
已知况又務控淮河地鄰徐汴居然深薄已歷炎涼某年
過始衰念深同氣實憂非據有辱至公迫於情誠輒祈休
罷相公推友悌之憂於天下妙咳唾之末於藩條爰擇良
材俾代其任獲殊常之福事過禱祠蒙不次之恩疾同影

響閨門大慶手足增榮未知殺身復在何日下情云云

爲河東公上鄭相公狀

某學輕筐篋略昧韜鈴仰藉時來因成福過夙當分土早
竊持符皆已淹時未始報政一時特迴天鑒超授厚官仍
常伯之榮兼司馬之職而豐憂器滿懼切泉深旋避莫能
陳遜不獲此皆相公優重干城之寄導揚錫爵之恩不計
貪叨但思獎賞自卜斯審所得尚多謹清勵冰霜堅同金
石漸期豐羨麤振稜威少謝武皮實甘馬革伏惟特賜恩

察

爲河東公賀陳相公送土物狀

右伏以相公蘭臺克成於故事黃扉顯正於嘉謀道協五
臣名高六相遠流休問實激含靈某忝建高旌方掀大旆
軍中之執旣闕於請纓土貢之餘尚盈於厥篚前件物等
薄如蜩甲輕甚鴻毛是願達誠敢求覩物延陵至鄭不隔
紵衣之微孔聖刪詩無廢木瓜之興貴賤雖聞有異古今
未始無茲干觸威嚴伏增兢懼

爲河東公賀楊相公送土物狀

右伏以相公光由版籍顯拜樞衡浴威鳳於池中問喘牛

於路左華夷共慶陰陽以調某雖久在民間常居軍右早
識薛宣之必相夙知蔣琬之爲公情異常時事殊庶品敢
申野外之贄麤罄囊中之裝前件物等價纔數金重非兼
乘同炙背之願獻况藉手以無因姚察養廉何妨於花練
謝安敦素猶取於蒲葵塵黷尊嚴伏深兢越

爲河東公賀李相公送土物狀

伏以相公脫屣華省振衣中樞溫樹人問而莫知非熊帝
感而斯兆軸青史而祇將紀德列景鐘而唯待銘功某任
屬啓行志唯盡敵誰言樗散最沐陶甄是敢竊獻食芹輒

羞行潦前件物等非因杼軸不曰苞苴曾未足云殊無所
直溫孫宏之被纜可禦寒易晏子之衣尚猶爲隘輕冒威
重伏用慙惶

爲河東公上李相公狀

某頑謝雕鐫散慙繩墨敢言人地可至圭符三刀之占已
聞於爲郡萬里之相復起於封侯而效若豪輕功如髮細
縱欲志兼冰蘖性約韋絃纔可立身未能報主昨者誰謂
尤異忽致遷昇官踰三命之尊秩總六條之首深惟速謗
是切固辭而假器如前循牆無及方茲有覲敢以爲榮相

金匱要略卷之二十一
公優禮藩維宏宣渥澤與之不悞期以有成亦旣思維莫
能負荷但當驅羊而鞭其最後牧馬而去其害羣極力訓
齊悉心董正冀無虞前敵取效他年用報國恩兼酬廟算
伏惟特賜恩察

爲河東公上李相公狀

伏見今月某日制書伏承相公假道版圖正位機密俞膺
帝曰歌叶臣哉動植具榮飛沈咸若爰稽往誥載考前經
齊定霸威由皆以告仲父漢興王道常謂不如蕭何此所
以顯重輔臣光昭宰匠以今況古千載一時且溫嶠累遷

尚見讓而不拜張華敘進亦聞久始卽真斯實重難常勞
倚注苟非才標棟幹味極和羹莫可比肩孰能接武六戎
傾首百辟寄心某早被蔭庠常聞咳唾今者適從亭障方
事鼓輦不敢擅棄虎符輒趨鳳誥下情云云

爲河東公與周學士狀

學士時仰高標世推直道果當清切以奉恩私地接蓬山
居遙閭苑敢期塵路獲望冰容然前者猶蒙問以好音致
之尺牘是何眷遇孰可欽承某自領藩條累蒙朝獎皆因
學士每於敷奏輒記姓名深憂李廣之不侯曲辨孟舒之

金定台月三
卷一百一十二
長者不有所自安能及茲方限征行末由款謁空餘深戀
貯在私誠伏惟特賜信察

爲宏農公上號州後上中書狀

右某伏奉某日制書出守以某日到任上訖伏以境臨東
雍地帶上陽爲匪沃饒外繁傳置遘驕陽積潦之患困苗
螟葉蠶之災將活齊人在擇良牧某因緣儒術塵汙郡符
皆由相公假以羽毛飾之丹腹隼飛旗上懼失於頒條熊
伏軾前恐乖於求瘼唯當夙宵罔懈深薄爲虞冀勞來而
有成庶疲羸而獲泰下情無任云云

爲宏農公號州上後上三相公狀

某本無遠韻實謝修途鄒衍文辭敢逃怪忤揚雄鉛槧終
取寂寥豈意相公拔自曲臺致之近郡貴從剖竹感在維
桑雖恩獎之是懷亦憂兢而斯在但當課其錢鏹督以杼
機使渤海田中永無佩犢平原境內盡死飛蝗免斯人溝
壑之虞贖他日簡書之責伏惟特賜恩察

爲宏農公上兩考官狀

伏見前月十九日恩制座主相公登庸某科等受恩伏增
榮抃閣下同德比義契重交深載惟爰立之榮佇見彙征

之吉下情不任迎賀踴躍之至伏惟照察

爲懷州刺史上後上門下狀

右某伏奉月日制書授持節懷州諸軍事守懷州刺史兼御史中丞者以今日到任上訖某特以門資早登朝選嘗奉出疆之任曾非泛駕之材直以揚大國之稜威奉良相之成算幸無挫屈兼免滯留業官未多無罪爲幸豈意相公上引睿旨下念勳家旣假寵於中司又頒條於名部去神州二百里而近無正守三十年已來記室參軍代司符印中兵祭酒分理城池今各額更新官司復舊用威寇

敵兼壯郊圻當此之時授任九重豈伊庸懦可以指令唯
當非憂人之不思非利物之不念罄忠武在行之衆奉盟
津攬轡之威冀無後艱以答殊獎伏惟俯賜恩察謹錄狀
上

於江陵府見除書狀

伏承榮兼史職伏惟感慰十三大學士學同九流文窮三
變果解殊選允用當仁千載興懷一時定法使馬遷死且
不朽猶畏後生若王隱魂而可知必慙非法凡厥儒學以
爲光榮况某嘗被恩知曾蒙講教唯望精聞變例竊見先

金史卷之三
經雖類偃商終一辭而不措庶同公穀許二傳以兼行伏
計清光必賜念記方之遐嶠臨上孤舟仰望玉音俯佩金
諾下情不任攀賀結戀之至

上令狐相公狀

不審近日尊體何如太原風景恬和水土深厚伏計調護
常保和平某下情無任忭賀之至豐沛遺疆陶唐故俗自
頃久罹憊亢頗至荒殘軒車纔臨日月未幾旱雲藏燎於
天末甘澤流膏於地中堡鄣復完汙萊盡闢此皆四丈膺
靈嶽瀆稟氣星辰繫庶有之安危與大君之休戚再勤龍

闕復還鳳池凡在生靈冀在朝夕伏惟爲國自重某才乏
出羣類非拔俗攻文當就傳之歲識謝奇童獻賦近加冠
之年號非才子徒以四丈東平方將尊隗是許依劉每水
檻花朝菊亭雪夜篇什率徵於繼和盃觴曲賜其盡歡委
曲款言綢繆顧遇自叨從歲貢求試春官前達開懷後來
慕義不有所自安得及茲然猶摧頽不遷拔刺未化仰塵
裁鑒有負吹噓倘蒙識以如愚知其不佞俾之樂道使得
諱窮則必當刷以羽毛遠謝雞鳥之列脫遺鱗鬣高辭鱣
鮪之羣逶迤波濤沖映霄漢伏惟始終憐察

上令狐相公狀

伏蒙仁恩賜借太原日所著歌詩等伏以四丈翊戴大君
儀刑多士鬱爲邦彥早司國鈞盛烈殊勲已光於帝載微
音清論復播於仁謠尚或研美二南留情四始峻標格而
山聯太華鼓洪濤而河到三門望絕攀躋理無揭厲足使
清風知媿白雪懷羞縱金懸而誰得求瑕但紙貴而莫不
傳寫某者頃雖有志晚無成功雅當畫虎之譏徒有登龍
之忝淮邸夙叨於詞客梁園早廁於文人每至因事寄情
寓物成命無不搦管興歎伏紙多慙思遲已過於馬卿體

弱復踰於王粲豈可思當作賦任竊言詩空懷博我之恩
寧發啓予之歎謹當附於經史寘彼縑緇永觀大匠之宏
規長作私門之秘寶伏惟特賜照察

上令狐相公狀

前月末八郎書中附到同州劉中琴書一封仰戴吹噓內
惟庸薄書生十上曾未聞於明習劉公一紙遽有望於招
延雖自以數奇亦未謂道廢下情無任佩德感激之至彼
州風物極佳節候又早遠聞漢水已有梅花繼兔園賦詠
之餘不有博奕蹈漳渠宴集之暇以挹酒漿優游芳辰保

奉全德伏思昔日嘗忝初筵今者縣隔山川違舉旌旆託
乘且殊於文學受辭不及於大夫仰望恩輝伏增攀戀

上令狐相公狀

伏奉月日榮示兼及前件綃等退省孱庸久塵恩煦致之
華館待以嘉賓德異顏回簞瓢不稱於亞聖行非劉實薪
水每累於主人東帛是將千里而遠緼袍十載方見於改
爲大雪文餘免虞於偃臥下情無任捧戴感勵之至

上令狐相公狀

今月二十四日禮部放榜某徼倖成名不任感慶某材非

秀異文謝清華幸忝科名皆由獎飾昔馬融立學不聞薦
彼門人孔光當權詎肯言其弟子豈若四丈屈於公道申
以私恩培樹孤株騫騰短羽自卵而翼皆出於生成碎首
糜軀莫知其報效瞻望旌棨無任戴恩隕涕之至

上令狐相公狀

前月七日過關試訖伏以經年滯留自春宴集雖懷歸若
無其長道而適遠方俟於聚糧卽以今月二十七日東下
伏思自依門館行將十年久負梯媒方霑一第仍世之徽
音免墜平生之志業無虧信其自強亦未臻此願言丹慊

實誓朝暾雖濟上漢中風煙特異而恩門故國道里斯同
北堂之戀方深東閣之知未謝夙宵感激去住彷徨彼謝
掾辭歸繫情於臯壤楊朱下泣結念於路歧以方茲辰未
偕卑素況自今歲累蒙榮示軫其飄泊務以慰安促曳裾
之期問改轅之日五交辟而未盛十從事而非賢仰望輝
光不勝負荷至中秋方遂專往起居未間瞻望旌旄如闕
天地伏惟俯賜照察

上令狐相公狀

伏承博士七郎自到彼州頓痊舊疾無妨步履不廢起居

某頃在東郡久陪文會嘗歎美疹滯此全材今則拜慶之
初累歲之拘攣頓釋承歡之始一朝而跪起如常理絕言
詮道符神用且相如瘠渴不聞中愈士安痺疾乃欲自裁
爰在前賢亦有沈痼豈若此蹒跚就路偃僂言歸念彼良
方始憂病在骨髓徵諸大易終聞蹇利西南此皆四丈德
契誠明七郎行敦孝敬纔當撫覲并愈疲羸某素受恩私
不任抃賀